

AKASHVANI AIZAWL
REGIONAL NEWS BULLETIN
HEADLINES (EVENING)

1. Kum hlui thlah zana Lunglei a Pi K. Vanlalngaii Kum 78 tualthih chungchangah a thattu ni ngei a rin chu Police-te’n an man.
2. Vawiin khan veng leh khaw hrang hranga tualchhung kohhran tam ber chuan hlim takin kum thar lawmna ruai an theh.
3. Nizan khan hmeichhe pakhat chu a ngaihzawng a vit ni a puhin Police-te’n an man.
4. Electronics and Information Technology changtu Union Minister Ashwini Vaishnaw chuan, sorkar laipuiin tun hnai khan Electronic lam siamchhuahna lama hmasawnna atan rawtna 22 a pawm thu a sawi.



MURDER SUSPECT ARREST

Kum hlui thlah zana Lunglei a Pi K. Vanlalngaii Kum 78 tualthih chungchangah a thattu ni ngei a rin chu Police-te’n an man.

He tualthihna-ah hian tualthattu hian hnuhma a hnutchhiah tlem hle chungin a chhuitu Police special investigation team (SIT) hian he thilthleng hi darkar 24 chhungin an chhui chhuak hman a. Lunglei district SP Pu J. Lalmuankima’n Akashvani Aizawl news a hrilh danin Pi K. Vanlalngaii thattu ni a rin Johny Rosangliana (41), Lunglei Bazar veng a cheng hi ruihhlo ngai a ni a. Tunhma-in Police in a lakah thubuai an la ziaak lut lo ni a hriat a ni a. A thah chhan tak hi hriat chian a la ni lo chungin Pi Ngaii hi rawk tumin a luh chilh a, he tah hian kut a thlakna lamah a that ta mai ni a hriat a ni a. Johny Rosangliana hian Pi Ngaii hi a thah ngei a nih thu a inpuang tawh niin Police-te chuan an sawi a ni. Tualthattu a puh hi vawiin khan Lunglei district court-ah hruai a ni a, court thupek angin jusicial custody a hlanin Lunglei district jail-ah dahluh nghal a ni.

Lunglei district SP chuan vawiin khan chanchinbumite hnenah hemi chungchang hi a sawifiah a. A chenna ina Pi K. Vanlalngaii ruang hmuh a nih thu hi kum hlui thlah zar dar 9 leh a chanve vel khan Lunglei Police Station-a thawkte chuan phone hmangin an dawng a. A hmunah thleng nghalin tihur tulte an ti nghal a. Pi K. Vanlalngaii ruang hi chhuatah tlu-in a lu chu thutphah sei-ah a innghat a.

Forensic team pawh koh niin a thih dan hi mi kut tuar ni ngei a a lan avangin a finfiahna awm thei ang angte dap a chhui a ni a.

SP ruahmanna-in a chhui bik tur SIT din a ni a. Pawikhawihtu hian hnuhma engmah a hnutchhiah mumal loh avangin harsa taka chhui zui a ni a. He ti chung hian nizan dar 9 khan pawikhawihtu ni a rinhlelh Johny Rosangliana hi man a ni ta a. Thu zawh fiah a nih lai-in ama tih ngei a ni tih a inpuang ta niin SP chuan a sawi a ni. He thil hi chhui zui mek zel a ni a, pawikhawihtu hi a an rinhlelh man hi a ni ngei a ni tih court lama finfiahna tur lakkhawm mek a ni a. Hemi hma hian Pi K. Vanlalngaii hi tualthi ngei ni a ngai-in Bharatiya Nyaya Sanhita (BNS) section 103(1) tlawhchhanin Lunglei Police Station-ah nimin khan thubuai ziah luh a lo ni tawh a ni.

<><><>

TRAIN TIMING

Nimin January ni 1 atang khan Guwahati-Sairang Guwahati Express rel chu a hun ngai angin a tlan chhunzawm.

Northeast Frontier Railway (NFR)-a chief public relations officer (CPRO) Pu Kapinjal Kishore Sharma hnen atanga Akashvani Aizawl news-in thu a dawn danin a hma a rel tlan hun sawn tura lo tih tawh, January ni 1 atanga hman tan tur chu sut leh a ni a. Tihdanglam tura an duan dan chuan Guwahati atanga Sairang pan tur rel hi zing dar 6-ah Guwahati chhuahsanin zan dar 7 leh a chanve a Sairang thleng tura tih a ni a. Chutiang bawkin Sairang rel chawlhmun atanga zing dar 6 a chhuakin zan dar 7 leh a chanve a Guwahati thleng tura ruahman a ni. He ruahmanna thar hi sut a nih leh tak avangin Guwahati atanga Sairang pana rel chhuak chu a hma ang bawkin tlai lam dar 7-ah Guwahati chhuahsanin a tuk zing lam dar 8 leh a chanve-ah Sairang a thleng a. Sairang rel chawlhmun atang pawhin tlai lam dar 7 a chhuakin a tuk zing dar 8 leh a chanve-ah Guwahati a thleng leh a ni.

Pu Sharma chuan rel hi zan lama a tlan chhunzawm leh tak avangin ruahman angin khawthlir nuam bik Vistadome coach pawh dah a ni ta rih lova. Hun lo la kal turah rel hnuhtir ve dan tur dap a la nih dawn tho thu NFR CPRO chuan a sawi a ni.

<><><>

NEW YEAR FEASTS

Vawiin khan veng leh khaw hrang hranga tualchhung kohhran tam ber chuan hlim takin kum thar lawmna ruai an theh.

Kum thar lawmna ruai hi nimin kum thar ni taka theh chu awm bawk mah se, a nawlpui chuan vawiin tlai khan ruai an theh a. Fatute’n zingah ran talhin sa an chan a, ruai tur atan an siam nghal a. Tlai lam dar 3 velah chuan ruai hi an peihfel hman hlawm tlangpui a ni. Ruai theh hma atang hian kohhran hall-ah te lengkhawm an awm a, kohhran thenkhat chuan a hranpa-in lengkhawm hlui an buatsaih a ni. Ruai theh zawh hian kum thar lawmna chu a tiak chawpchilh nghal a. Nu leh pa lungleng deuh lengkhawm zui erawh chu an awm awm e. Aizawl khawpui-a kum thar ruai atana ran talh a tam tham hle a. Aizawl khawpui veng hrang hranga ran talh zat erawh chu a vai-in hriat theih a ni lo.

Aizawl Salem Mualpui Venga Animal Husbandry & Veterinary Department enkawl ran talhna hmun Slaughter House-a thawktute chhinchhiah danin nikum

December 2025-ah khan bawng 103 talh a ni a, nimin january ni 1 ah bawng 60 talh a ni bawk. Slaughter House-a tawhktuten Akashvani News Aizawl an hrilh danin Krismas leh Kumthar ruai atana bawng an talhte hi Burma ram atanga lakluh an ni tlangpui a, bawng pakhat hi chawh rualin tualchhungah cheng nuai 1 sing 2 ang vel a nih thu an sawi bawk. District hrang hrangah pawh kum thar lawmna ruai hi nimin leh vawiina theh an awm a.

Sorkar pisa chawlh a la ni a, kar leh Thawhtanni atangin sorkar pisa hi hawn tan leh a ni dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

POLICE, HOSPITAL REPORTS

Nizan khan hmeichhe pakhat chu a ngaihzawng a vit ni a puhin Police-te’n an man.

Mizoram chhung Police Station hrang hrang atanga Akashvani News Aizawlin thu a dawn danin nimin tlai atanga tukin thlenga tang awm zat chu 15 an ni a, heng zingah hian hmeichhia 3 an tel. Mizoram chhunga Police Station leh Police Outpost hrang hrangte chhinchhiahna atanga a lan danin, rukruk kaihhnawiha man mi 4 an awm a, zu rui a buaina siam vanga man mi 3 leh chhungkua a buaina siam avanga tang mi 3 bakah ruihhlo vanga man mi 2, chemtea mi vihh vanga man mi 1, mi khawih tum vanga man 1 leh thubuai kal lai chungchanga rinhlelh a man 1 a awm bawk.

Aizawl Police Station-ah chemtea invih thubuaiah hmeichhe pakhat kum 40 mi, Ramthar Tlang Veng a khawsa mek ni a inchhal chu man a ni a. Police atanga Akashvani News Aizawlin thu a dawn danin pawikhawihtu a puh leh a bialpa chu Rangvamual a an zu la haw, a mipa zawkte inah hian intibuaiin a hmeichhia zawk hian chemte a chuh a, a mipa lo indang chu a ban tawn tawnah a vit a, mipa hi Civil Hospital Aizawlah admit niin, mipa chhungte hian FIR an thehluh bawhzuiin hmeichhia hi man a ni a, vawiinah court-a hruai a nih hnuah Central Jail-a dah luh nghal a ni. Aizawl Police Station-a tang hmeichhe dang pakhat zawk hi rukruk vanga man a ni.

Lunglei Police Station-a tang 5 awm zingah 2 te chu zu rui a intihbuai vanga man niin, tang dangte chu rukru a rinhlelh man 2 leh thubuai kal lai chungchanga rinhlelh man 1 te an ni a. Champhai Police Station-a tang mipa 2 te hi chhungkaw thubuai a man an ni a, hmeichhe awmchhun hi Zokhawthar Police Station-a ruihhlo thubuai a man, thu zawhfiah leh tura Champhai Jail atanga an lak chhuah la hren zui tak zel a ni. Kulikawn Police Station-ah zu rui a buaina siam vanga man 1 leh rukru a rinhlelh man 1 an awm a. Khawzawl Police Station-ah tang 2, mi khawih tuma

rinhlelh man 1 leh chhungkaw thubuai a tantir 1 an awm a. Saitual Police Station-ah Assam mi pakhat, Methamphethamine ni a rin Kg 11 chuang mansak chu an kawl mek bawk.

Nimin January ni 1 atanga vawiin January ni 2 chhungin Aizawla damdawiin hrang hrangte chhinchhiah danin mitthi 5 an awm a, nau piang 19 an awm bawk.

Nimin tlai atanga tukin thleng khan Civil Hospital Aizawl Casualty chuan Emergency Case 91 an nei a, heng zingah hian pumna, luak leh khawsik a tam ber a, Emergency case zingah hian damdawi-ina enkawl zui mi 10 an awm a. Damdawi-in dang atanga rawn insuan lut 4 awmin, admit ngai si, khum awm loh avanga dawmdawi-in danga thawn 2 an awm bawk. Civil Hospital Aizawl-a thawktute sawi danin lirthei chetsualna vanga hliam 3 zingah ruh tliak 2 an awm a; ui seh 1 a awm bawk a, ruihhlo overdose mipa 2 te chhan hman an ni bawk. Civil Hospital-ah hian nimin zing dar 7:00 atanga tukin dar 7:00 inkar chhungin nau piang mipa pakhat leh hmeichhia pakhat an awm a ni.

Synod Hospital Casualty chuan nimin tlai atanga tukin thlenga emergency case 21 an neih zingah mi 10 an admit a, mitthi an nei lova, emergency case tam ber pumna leh khawsik a ni. Nau piang hmeichhia 3 leh mipa 1 an awm bawk.

Zoram Medical College and Hospital Falkawnah nimin tlai atanga tukin thlenga emergency case awm zat chu 40 a ni a, mitthi 2 an nei a; Nau piang 6 an nei bawk, ZMC & H thawktute sawi danin emergency case hi pumna, accident, thawhah leh zu in avanga natna te an ni hlawm.

Heng bakah hian Aizawl Hospital and Research Center-ah mitthi 1 leh nau piang 3 an awm a, LRM Hospital ah mitthi 1 leh nau piang 1 an awm bawk. Ebenezer Medical Center ah nau piang 2 awmin Adventist Hospital Seventhday tlangah nau piang 1 a awm bawk.

<><><>

FCI WAREHOUSE

Food Corporation of India (FCI) chhinchhiah danin Mizoram chhungah kudam, a vai a belhkhawm a buhfai metric tonne 31,842 dah khawl theihna a awm mek.

FCI hotuten Akashvani News Aizawl an hrihlh danin, an kudam zingah hian Bairabi leh Kolasib-a an kudam chu a lian bera a, Bairabi leh Kolasib-a FCI kudam-ah hian buhfai metric tonne 6,264 ve ve a dah khawl theih a. Aizawl leh Bualpui kudam in dawt lehin, heng kudam pahnihah te hian buhfai metric tonne 5,742 a leng ve ve a, heng bakah hian Lawngtlai kudam-ah bufai metric tonn 4,176 bakah Lunglei kudam-ah buhfai metric tonn 3,654 a dah khawl theih bawk a ni.

<><><>

ELECTRONICS

Electronics and Infprmation Technology changtu Union Minister Ashwini Vaishnaw chuan sorkar laipuiin tunhnai khan Electronics lam siamchhuahna lama hmasawna atan rawtna 22 a pawm thu a sawi.

Union Minister chhuan heng rawtna pawm thar 22 tana sum ruahman zat chu cheng vaibelchhe nuai 2 sing 5 sang 8 anih thu sawiin hei hian thalai sing 2 sang4 zet chu hna a siamsak tur thu a sawi a, Prime Minister Modi-a kaihhruai sorkar chuan tunlai changkanna mil zeal India ram herrem a, khawvel ramdang elpha tura India buatsaih chu a thiltum ber anih thu leh hemi kuhmumah hian India thalaite’n par an chhuan theih ngeina atan nasa taka tan an lak thu a sawi.

<><><>